

Komunikadu Imprensa

Preokupasaun kona-ba alterasaun sira ba Kurrikulu Nasionál Pre-eskolár no Ensinu Báziku

Data: 8 fulan-fevreiru tinan 2018

Kontaktu média nian: Cisca Alves, Fokupers (77310355), nomós Sra. Rosy de Sousa (77779555)

Semana ida liubá, organizasaun nasional lubuk ida no sidadaun na'in-70, haruka karta ba Timor-Leste nia Prezidente Francisco 'Lu Olo' Guterres hodi hato'o preokupasaun kona-ba proposta halo alterasaun ba Dekretu-Lei rua ne'ebé regula edukasaun pre-eskolár no ensin u báziku siklu dahuluk no daruak (to'o klase 6). Karta ezije Prezidente atu la promulga alterasaun sira, tan proposta halo alterasaun mai derrepente de'it no la bazeia ba avaliasaun válidu no sientífiku, maibé tuir loloos la'o kontra peskiza barak ne'ebé suporta kurrikulu *en vigora* (ne'ebé la'o tuir lei agora daudaun).

Iha lora 25 fulan-janeiru tinan 2018, lora ida antes Prezidente disolve Parlamentu no anuncia Eleisaun Antisipada, Konsellu Ministru sira hala'o enkontru 'estraordináriu' no aprova alterasaun sira ba Dekretu-Lei N°3 no N°4/2015. Husi informasaun uitoan de'it husi Prezidénsia Konsellu Ministrus, ema bele komprende katak alterasaun sira inklui aumenta oras mínimu ba pre-eskolár no determina Portugés nu'udar lian predominante no hatún Tetun sai fali 'auxiliár' de'it iha kurrikulu.

Konstituisaun RDTL afirma Tetun no Portugés nu'udar lian rua ne'ebé ofisiál no afirma katak lia-tetun no lian nasional sira seluk tenke hetan valoriza no dezenvolve husi Estadu. Masi lider balu fó sai mensajen sira kontráriu, kurrikulu ne'ebé aplika agora daudaun la hanorin lian lokal (lian inan) sira, maibé fó fatin ba mestre sira iha klase kí'ik sira atu uza lian sira-ne'e tuir nesidade hodi apoia kompriensaun no inkluziun bainhira labarik seidauk hatene Tetun ka Portugés. Kurrikulu 2015 hahú hanorin literasia no numerasia ho lian ofisiál Tetun tanba labarik no família barak liu komprende Tetun kompara ho Portugés. Planu progresiun lian nian ne'ebé estruturadu ajuda estudante sira halo transferénsia matenek no kapasidade sira-ne'ebé dezenvolve tiha iha Tetun ba Portugés; estudu oiin hatudu katak metodolojia ne'e haforsa estudante sira-nia susesu skolár. Objetivu fundamentál husi métodu ida-ne'e mak labarik sira hotu iha ita-nia rain iha koñesimentu sólidu ba lian ofisiál rua hotu no mós sai matenek iha matemátika, siénsia no dixiplina seluk tan, molok klase 6 nia rohan.

Organizasaun no indíviduu sira-ne'ebé asina karta ba Prezidente iha kompromisu hanesan atu iha edukasaun dí'ak no inkluzivu ba labarik Timoroan hotu-hotu, la ho apartidarizmu ida. Sira mós iha mehi hamutuk katak edukasaun bele sai sektor ne'ebé sempre valoriza aprosimasaun sira-ne'ebé bazeia ba evidénsia, la'ós instrumentu politikál.

Iha karta, sira konta katak, hahú iha tinan 2013 no to'o tinan 2017, sira hotu envolve iha maneira oioin ho dezenvolve kurríkulu ne'e, inklui hetan konsulta no kolabora hamutuk atu dezenvolve materiál oin-oin, inklui livru barak iha lian Tetum; nune'e sira hakfodak tebes atu rona derrepente kona-ba alterasaun sem konsulta ida.

Sira hakerek: "Ami komprende katak pontu importante hosi kurríkulu *en vigor* agora mak valoriza no motiva alunu sira-nia partisipasaun no aprendizajen ativu, ne'ebé mak susar atu akontese se labarik sira la komprende profesór no la bele expresa an. Ami mós komprende katak inan-aman nia partisipasaun iha oan nia eskola importante tebes, ne'ebé susar atu hala'o se inan-aman sira la komprende saida mak sira-nia oan aprende. Peskiza barak halo tiha ona ne'ebé hatudu susesu ho métodu progresasaun linguístiku nian iha rai barak no mós inklui iha Timor-Leste nia laran".

Ikus liu, ONG no indíviduu sira husu atu Prezidente la promulga alterasaun ba métodu hanorin bainhira Governu seidauk bele hatudu evidénsia sientífiku katak kurríkulu aprova iha 2015 sei la atinje edukasaun ho kualidade. Sira mós hato'o sira-nia disponibilidade atu hasoru SE Prezidente da Repúblika hodi esplika sira-nia pozisaun kle'an liután.

Organizasaun sira-ne'ebé asina karta ba Prezidente inklui: Fokupers, Knua ba Labarik, Fundasaun Alola, ACbit, AJAR, La'o Hamutuk, Belun, Haburas, Permatil, MOFFE no Rede Feto Timor-Leste.

Atu hetan informasaun liu tan kona-ba asuntu ne'e, bele liga ba
<http://www.laohamutuk.org/educ/18CurriculumTe.htm>